



**Sud Bosne i Hercegovine**  
**Суд Босне и Херцеговине**

---

Broj: S1 3 IŽ 048789 24 IŽ  
Sarajevo, 07.08.2024.godine

Sud Bosne i Hercegovine u Sarajevu, u apelacionom vijeću sastavljenom od sudija Mirsade Džindo kao predsjednika vijeća, Dinke Bešlagić-Čovrk i Hilme Vučinić, kao članova vijeća, odlučujući o žalbi političke stranke Demokratski savez-Demos Banja Luka iz Banja Luke, Kralja Petra I Karađorđevića 109, izjavljenoj protiv Odluke Centralne izborne komisije Bosne i Hercegovine broj: 05-1-07-5-1067/24 od 01.08.2024.godine, o utvrđivanju odgovornosti za vođenje preuranjene izborne, u nejavnoj sjednici, održanoj dana 07.08.2024.godine, donio je

**R J E Š E N J E**

**Žalba se odbija.**

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu utvrđena je odgovornost političke stranke Demokratski savez-Demos Banja Luka iz razloga što je , putem društvene mreže Facebook vodio preuranjenu izbornu kampanju, pa joj je na osnovu člana 6.7 stav 2. tačka 1. Izbornog zakona BiH i primjenom odredbe člana 19.9 stav 1. tačka 3. Izbornog zakona BiH izrečena novčana kazna u iznosu od 4.500,00 KM.

Naloženo je Demokratskom savezu-Demos Banja Luka da sa društvene mreže Facebook ukloni spornu objavu za koju je Centralna izborna komisija BiH izrekla novčanu kaznu, te da politička stranka Demokratski savez-Demos Banja Luka, sve pristalice i kandidate ove političke stranke za predstojeće Lokalne izbore 2024. godine obavijesti da su dužni da se suzdrže od javnog oglašavanja i vođenja izborne kampanje u elektronskom, onlajn i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Protiv navedene odluke žalbu je izjavila politička stranka Demokratski savez-Demos jer Centralna izborna komisija BiH nije pravilno utvrdila sve činjenice i okolnosti i da nije u potpunosti na pravilan način tumačila član 7.1 Izbornog zakona BiH. Žalba smatra da na spornom video zapisu nije predstavljena promocija programa političke stranke, niti bilo kakve političke poruke, već su izneseni problemi sa kojima se susreću građani naselja Lauš, od strane člana Savjeta mjesne zajednice.

Predlaže da se žalba usvoji i poništi sporna odluka.

U odgovoru na žalbu Centralna izborna komisija Bosne i Hercegovine (u daljem tekstu CIK BiH) je predložila da se žalba odbije kao neosnovana.

Žalba nije osnovana.

Iz stanja spisa proizlazi da je CIK BiH dana 10.07.2024. godine nakon što je putem e-maila zaprimila inicijativu sa dokazima za pokretanje postupka po službenoj dužnosti podnesenu od strane Centra civilnih inicijativa (za Koaliciju „Pod lupom“) da je dana 19.06.2024. godine na Facebook stranici političke stranke DEMOS Banja Luka objavljen video zapis sa tekstom , u kojem su navedeni neki od problema s kojima se susreću građani iz Grada Banja Luka, naselje Lauš, pa s obzirom da u jednom o kadrova prikazuje prostorije mjesne zajednice, osnovnu školu i vrtić, nosilac inicijative smatra da je došlo do kršenja odredbe člana 7.2a Izbornog zakona BiH, jer su iskorištene prostorije javnih ustanova za predizbornu kampanju. U video zapisu se predlažu neki od načina rješavanja problema, uz poziv „Pozivamo vas da nam se pridružite, da naš Lauš učinite ljepšim i boljim..“

Žalitelj je blagovremeno dostavio izjašnjenja navodeći da se u konkretnom slučaju ne radi o preuranjenoj kampanji, nego da gospodin Damir Jovanović govori u svojstvu člana Savjeta mjesne zajednice Lauš ukazujući na probleme sa kojima se građani iz MZ Lauš i drugih dijelova grada susreću. U prilogu se ne spominju kandidati, kao ni slogan političke stranke na predstojećim Lokalnim izborima 2024. godine. Ne smatraju da je prekršen član 7.2a Izbornog zakona BiH jer je navedeno lice član demokratski izabranog predstavničkog tijela, Savjeta mjesne zajednice Lauš.

Pravilan je zaključak CIK BiH da je došlo do kršenja odredbe člana 7.1 Izbornog zakona BiH jer iz dokaza koji se nalaze u spisu, jasno proizlazi da je politička stranka Demokratski savez-Demos odgovorna što je putem društvene mreže Facebook vodila izbornu kampanju u periodu preuranjene izborne kampanje.

Odredbom člana 7.1 Izbornog zakona BiH propisano je da je u periodu preuranjene izborne kampanje zabranjeno vođenje izborne kampanje u elektronskim, online i štampanim medijima i putem društvenih mreža ili bilo koji oblik javnog oglašavanja kampanje. Ova zabrana ne odnosi se na organizovanje zakonitih zvaničnih skupova organa i događaja političkih subjekata u svrhe koje nisu kampanja.

U članu 1.1a stav 1. tačka 8. Izbornog zakona BiH, propisano je da je „Preuranjena kampanja“ svaki oblik radnji iz kampanje koje preduzimaju politički subjekti u periodu od raspisivanja izbora do perioda zvaničnog početka izborne kampanje.

Odredbom člana 9. stav 1. Pravilnika o medijskom predstavljanju i javnom oglašavanju političkih subjekata u izbornom periodu („Službeni glasnik BiH“, broj 31/24) propisano je da je u periodu preuranjene kampanje političkim subjektima zabranjen svaki oblik radnje iz kampanje koje preduzimaju politički subjekti u periodu

od raspisivanja izbora do perioda zvaničnog početka izborne kampanje. Stavom 2. istog člana propisano je da se zabrana iz stava 1. ovog člana odnosi na upoznavanje birača i javnosti sa programom i kandidatima političkih subjekata za predstojeće izbore.

Nije osnovana tvrdnja žalitelja da Centralna izborna komisija nije pravilno i potpuno utvrdila sve činjenice jer iz dijela objave proizilazi: „Pozivamo vas da nam se pridružite da naš Lauš učinimo ljepšim i boljim“, a na kraju zapisa se pojavljuje logo političkog subjekta u vidu pečata. Zatim iz opisa predmetne objave stoji:“ Da bi ovo naselje postalo urbano središte, ključno je da svi sarađujemo i doprinosimo zajedničkom cilju“, sa sa potpisom i na kraju video zapisa „DEMOS“, a u video zapisu se obračalo lice koje se potpisalo kao „Damir Jovanović, mjesni odbor Lauš DEMOS Banja Luka, a ne član mjesne zajednice. Iz navedenog teksta proizilazi nesporna činjenica da objave u svom opisu i sadržaju pokazuju promociju programa ove političke stranke za predstojeće Lokalne izbore 2024. godine, sa ciljem upoznavanja javnosti i birača sa programom navedene političke stranke, što predstavlja radnju koampanje koja nije dozvoljena u periodu od raspisivanja izbora do perioda zvaničnog početka izborne kampanje.

Dakle iz provedenih dokaza jasno proizilazi da je politička stranka Demokratski savez-Demos postupila suprotno odredbama člana 7.1 Izbornog zakona BiH, što je u skladu sa odredbom člana 19.9 stav 2. Izbornog zakona BiH.

Stoga je prema shvatanju vijeća Apelacionog odijeljenja Suda BiH pobijana odluka CIK BiH pravilna i zakonita, jer se radi o nedozvoljenoj radnji u smislu člana 19.9 stav 1. tačka 3.i stav 2. Izbornog zakona BiH odnosno da se radi o promociji političke stranke prije zvanične izborne kampanje.

Pravilno je izrečena i visina novčane kazne, cijeneći kao otežavajuću okolnost da je Centralna izborna komisija BiH, političkoj stranci Demokratski savez-Demos za isti prekršaj u ovom izbornom ciklusu već ranije izricala dvije novčane kazne, zbog vođenja preuranjene kampanje.

Opravdanim i nužnim je izrečena i privremena mjera političkoj stranci DEMOS Banja Luka, da sa društvene mreže Facebook ukloni spornu objavu za koje je Centralna izborna komisija BiH izrekla novčanu kaznu, te da sve pristalice i kandidate ove političke stranke za predstojeće Lokalne izbore 2024. godine obavijesti da su dužni da se suzdrže od javnog oglašavanja i vođenja izborne kampanje u elektronskom, onlajn i štampanim medijima i putem društvenih mreža ili bilo kojeg oblika javnog oglašavanja kampanje prije zvaničnog početka izborne kampanje.

Iz svih izloženih razloga ovo vijeće je osporenu odluku, ocijenilo u potpunosti pravilnom i zakonitom, slijedom čega je žalbu, primjenom odredbe člana 81. stav 1. Zakona o upravnim sporovima Bosne i Hercegovine („Službeni glasnik BiH“ broj 19/02 do 74/10) valjalo odbiti.

PREDSJEDNIK VIJEĆA  
S U D I J A  
Mirsada Džindo